



**Na Elder Hugo E. Martinez**  
No te Hitu Ahuru

# Ta tatou iho utuuturaa i te taata

*E ti'a i te here o Iesu Mesia ia riro mai ei arata'i no tatou, ia ti'a ho'i ia tatou ia ite i te mau hinaaro o te feia o ta tatou e nehenehe e tauturu.*

I roto i Te Ekalesia a Iesu Mesia i te Feia Mo'a i te Mau Mahana Hopea Nei, ua horo'ahia mai ia tatou te rave'a e te haamaitairaa ia tavini. Mai to'u riroraa ei melo, ua tavini au i roto e rave rahi ohipa. Mai ta te taea'e Udine Falabella, metua tane no Elder Enrique R. Falabella, i mataro i te parau, « te taata e tavini i roto i te tahi ohipa, e maitai ia to'na no te tahi mea ; te taata aita e tavini i roto i te hoê mea, aita ia to'na e maitai no te hoê mea ». E mea ti'a ia tatou ia tape'a i teie mau parau i roto i to tatou upoo e i roto i to tatou aau.

A imi ai au i te arata'iraa i roto i ta'u taviniraa, ua itehia ia'u te tamanahana na roto i te haamana'oraa e, e faatumu te Faaora i ni'a i te taata e te utuafare. Ua haapii mai To'na here e to'na aroha i te taata e, te ite nei Oia i te maitai rahi o te mau tamarii tata'itahi a te Metua i te Ao ra, e e mea faufaa no tatou ia haapapû e, te utuutuhia nei e te faaito'itohia nei te taata tata'itahi na roto i te evanelia a Iesu Mesia.

Te tai'o nei tatou i roto i te mau papa'iraa mo'a e :

« A haamana'o e, e faufaa rahi to

te mau varua taata i to te Atua hi'oraa mai...

« E mai te mea e hope to orua *pu'e* tau mahana... e ia arata'i mai orua, *i te hoê noa a'e* varua taata ia'u nei, aue ho'i to orua oaoa rahi i piha'i iho ia'na i roto i te basileia o to'u Metua ! »<sup>1</sup>

E faufaa rahi to te hoê varua taata

i mua i te Atua, no te mea, e mau tamarii tatou Na'na e tei roto ia tatou te faito puai no te riro mai Ia'na te huru.<sup>2</sup>

E ti'a i te here o Iesu Mesia ia riro mai ei arata'i no tatou, ia ti'a ho'i ia tatou ia ite i te mau hinaaro o te feia o ta tatou e nehenehe e tauturu. Na te mau haapiiraa a to tatou Fatu, o Iesu Mesia, e faa'ite mai ia tatou i te rave'a. E mea na reira ta tatou iho utuuturaa i te taata i te haamata : te iteraa i te mau hinaaro, e i muri iho, te tautururaa ia i reira. Mai ta te tuahine Linda K. Burton, peresideni rahi no te Sotaiete Tauturu, i parau ra, « a hi'o na mua, i muri iho, a tavini ».<sup>3</sup>

Ua riro te peresideni Thomas S. Monson ei hi'oraa rahi no teie parau tumu. I te ava'e tenuare 2005, na'na i peresideni i te hoê amuiraa na te feia faatere no te autahu'araa i Puerto Rico, e ua faa'ite mai oia e mea nahea te Faaora e To'na mau tavini raveraa i te ohipa taviniraa na roto i te utuuturaa ratou iho i te taata. I te faaotiraa taua pureraa nehenehe ra, ua haamata a'era te peresideni Monson i te aroha i te mau ti'a faatere atoa o te autahu'araa i roto i te amuiraa. I te hoê taime, ua ite a'era oia e, te hi'o noa maira te hoê ti'a faatere na te atea, oia ana'e.

Ua faaate'atura te peresideni Monson i te pûpû, no te haere i piha'i iho i taua taea'e ra, e ua paraparau



atura ia'na. Ma te aau putapu, ua parau maira o José R. Zayas ia'na e, ua riro to'na tapirira'atu i piha'i iho ia'na ei semeio, e ei pahonora a te mau pure ta raua ta'na vahine o Yolande i pûpû hou a tupu ai te putuputuraa. Ua parau maira oia i te peresideni Monson e, e mea ino roa ta'na tamahine, e te vai nei ia'na ra te hoê rata na ta'na vahine o tei hinaaro ia horo'ahia'atu i te peresideni Monson ra. Ua parau te taea'e Zayas i ta'na vahine e, eita e nehenehe, no te mea, e mea ohipa roa te peresideni Monson. Ua faaroo noa te peresideni Monson i te aamu e ua ani atura i te rata, e ua tai'o a'era i te reira ma te muhu ore. I muri iho, ua tuu atura oia i te reira i roto i te pute o to'na pereue e ua parau atura i te taea'e Zayas e, na'na e haapa'o i ta raua aniraa.

I roto i teie hi'oraa, na to tatou Fatu o Iesu Mesia i haaputapu i taua utua-fare ra, na roto i To'na tavini. Te ti'aturi nei au e, e tano te mau parau a te Faaora i roto i te parabole no te taata Samaria maitai i ni'a ia tatou : « E haere oe, e na reira atoa ».<sup>4</sup>

I te 21 no setepa 1998, ua ta'iri te mata'i rorofa'i Georges ia Puerto Rico, e ua ino roa te fenua. Ua faaea noa vau e te tuahine Martinez e ta maua mau tamarii e pae, i roto i to matou fare, no te paruru ia matou i taua vero rahi ra e i te puai o te mata'i rorofa'i. Tera râ, e piti hepetoma to matou vainoa-raa aita e pape tahe e aita e uira.

I te paura ta matou pape inu, e mea fifi roa ia roaa faahou mai. Eita roa'atu e mo'ehia ia'u te mau taea'e tei tauturu mai ia matou na roto i te afa'i-raa mai i taua pape faufaa rahi ra, eita atoa e mo'ehia ia'u te rave'a here o te taviniraa a te mau tuahine ia matou.

Ua tae mai o Germán Colón i to matou fare no te afa'i mai i te hoê faarii pape na ni'a i te hoê pereoo pani. Ua parau mai oia ia matou e, ua rave oia i teie ohipa no te mea, ia au i ta'na mau parau, « ua ite au e, e mau tamarii na'ina'i ta orua o te hinaaro i te pape ». Tau mahana i muri mai, ua faauta te taea'e Noel Muñoz e te taea'e Herminio Gómez e toru faarii pape rarahi i ni'a i te pereoo pani. Ua tae mai raua i to matou fare ma te mana'o-orehia, e ua faa'i i te mau mohina pape



inu atoa e vai ra, e ua ani atoa i te mau taata na piha'i iho mai ia matou ia faa'i atoa i ta ratou mau mohina.

Ua pahonohia ta matou mau pure na roto i ta ratou iho utuuturaa i te taata. E itehia i ni'a i te hoho'a mata o teie na taea'e e toru te here o Iesu Mesia ia matou, e ua horo'a mai ta ratou taviniraa—oia ho'i, ta ratou iho utuuturaa i te taata—hau atu i te pape inu i roto i to matou oraraa. No te tamaiti e aore râ, te tamahine a te Atua, e mea faufaa no'na ia ite e, te haapa'o nei e te ara nei te taata i ni'a i to'na oraraa maitai.

Te faa'ite papû nei au ia outou e, ua ite te Metua i te Ao ra e to tatou Fatu o Iesu Mesia, ia tatou tata'itahi. No reira, te horo'a mai nei Raua i te mau mea e hinaarohia e tatou, ia ti'a ho'i ia tatou ia farii i te rave'a no te titau i to tatou faito puai hanahana. I ni'a i te e'a, te tuu nei Raua i te taata o te tauturu ia tatou. I muri iho, ia riro ana'e mai tatou ei mauhaa i roto i to Raua rima, e ti'a ia tatou ia tavini e ia tauturu i te feia ta Raua e faa'ite mai ia tatou na roto i te heheuraa.

Na roto i te reira e ti'a ai i te Fatu ia Iesu Mesia ia toro i te rima i te mau tamarii atoa a te Metua i te Ao ra. E haaputupu te tia'i mamoe maitai i Ta'na mau mamoe. E na reira Oia tata'i hoê mai te mea e, e faaohipa maitai ratou i to ratou t'amâraa—i muri a'e i te faarooraa i te reo o Ta'na mau tavini e te fariiraa i ta ratou utuuturaa. Ei reira ratou e ite ai i To'na reo, e e pee atu ratou Ia'na. Tei roto teie huru

utuuturaa ta tatou iho i te taata i te parau no te haapa'oraa i ta tatou mau fafauaraa no te bapetizoraa.

Oia atoa, na roto i te riroraa ei hi'oraa maitai no te hoê pîpî a Iesu Mesia, e riro te reira ei rata maitai roa a'e na tatou no te faa'ite atu ia tatou i te feia o ta tatou e nehenehe e faa'ite i Ta'na evanelia. Mai te mea e, e hamama tatou i to tatou vaha e e faa'ite ho'i i te evanelia a Iesu Mesia i faaho'i-faahouhia mai, e riro ia tatou ei « mau tia'i mamoe mono Na'na, no te faaamu i te mamoe o Ta'na aua e te mau arenio o Ta'na na'na »<sup>5</sup>; e riro ia tatou ei « feia paruparu e te mea ite ore ho'i »<sup>6</sup> ei « ravaai taata ».<sup>7</sup>

Aita ta tatou taviniraa e ta tatou iho utuuturaa i te taata i ta'otihia no te feia e ora noa nei i ni'a i teie fenua. E nehenehe atoa tatou e rave i te ohipa no tei pohe—no ratou o te ora nei i roto i te ao varua, o tei ore i farii i te rave'a no te farii i te mau oro'a no te faaoraraa o te evanelia a Iesu Mesia, a ora ai ratou i te tahuti nei. E nehenehe atoa tatou e papa'i i te hoê buka aamu e ia papa'i i te mau aamu o to tatou utua-fare no te faafariu i te aau o te feia ora i ni'a i te feia ora—e tae noa'atu i te aau o te feia ora i ni'a i to ratou mau tupuna. E rave'a te reira no te taamu i to tatou utua-fare, tera u'i e tera u'i, i roto i te mau taatiraa mure ore. Mai te mea e, e na reira tatou, e riro tatou ei mau « faaora... i ni'a i te mou'a no Ziona ».<sup>8</sup>

Ua farii tatou i te rave'a taa e no te riro ei mauhaa i roto i To'na rima. E nehenehe ta tatou e na reira i roto

i to tatou faaiporaa, i roto i to tatou utuafare, i rotopu i to tatou mau hoa, e i rotopu i to tatou mau taata tupu. Tera ia ta tatou iho utuuturaa i te taata ei mau pīpī mau na Iesu Mesia.

« E e haaputuhia to te mau fenua atoa i mua i to'na aro : e na'na e faataa ia ratou mai te tiai mamoe e faataa i te mamoe i te puaniho ra :

« E e tuu oia i te mamoe i ta'na rima atau, e te puaniho i te rima aui.

« Ei reira te arii e parau a'e ai i tei ta'na rima atau ra, a haere mai outou, e te feia i faaorahia e tau Metua, e parahi i te basileia i haapa'ohia no outou mai te hamaniraa mai o te fenua nei ra :

« I poia na ho'i au, e ua horo'a mai outou i te maa na'u ; i poiha na vau e ua faainu mai outou ia'u ; e taata e au, e ua ite mai outou ia'u :

« I veve na vau, e ua faaahu mai outou ia'u ; i pohe na vau i te ma'i, e ua utuutu mai outou ia'u ; i roto vau i te tapearaa, e ua haere mai outou ia'u ra.

« Ei reira te feia parau-ti'a ra e na ô a'e ai te parau ia'na, e te Fatu, i nafea matou i ite ai ia oe i te poiaraa, e ua faaamu ia oe ? e te poihaaraa, e ua faainu atu ia oe ?

« I nafea matou i ite atu ai ia oe, e e taata e, e ua ite atu ia oe ? e te vevera, e ua faaahu ia oe ?

« I nafea matou i ite atu ai ia oe i te poheraa i te ma'i, e i roto i te tapearaa, e ua haere atu ia oe ra ?

« E na ô a'e te arii i te parau ia ratou, na ô a'era, oia mau ta'u e parau atu ia outou nei, o outou i na reira i te hoê taea'e iti ha'ha'i roa i roto i tau mau taea'e nei, ua na reia mai ia outou ia'u ».<sup>9</sup>

Te pure nei au ia na reira atoa tatou, na roto i te i'oa o Iesu Mesia, amene. ■

#### TE MAU NOTA

1. Te Parau Haapiiraa e te mau Parau Fafau 18:10, 15 ; reta tei faahuru-ê-hia.
2. A hi'o i te Buka arata'i no te mau papa'iraa mo'a, « Varua » ; scriptures.lds.org.
3. Linda K. Burton, « A hi'o na mua, i muri iho a tavini » *Liahona*, Novema 2012, 78.
4. Luka 10:37.
5. Alexander B. Morrison, « Nourish the Flock of Christ », *Ensign*, Me 1992, 13.
6. Te Parau Haapiiraa e te mau Parau Fafau 1:23.
7. Mataio 4:19.
8. Obadia 1:21.
9. Mataio 25:32–40.



**Na Elder Larry S. Kacher**  
No te Hitu Ahuru

## Eiaha e rave tapetepete i te mau mea mo'a

*Ia hi'opo'a i ta outou mau ma'itiraa na roto i te uiraa ia outou iho i teie uiraa, « ua tanu-papû-hia anei ta'u mau faaotiraa i roto i te repo maitai o te evanelia a Iesu Mesia ? »*

**E** te mau taea'e e te mau tuahine, e riro te mau faaotiraa ta tatou e rave i roto i teie oraraa i te faaoti i to tatou tere i te oraraa mure ore. E toopiti puai, tei itehia e tei ite-ore-hia, o te faaûru nei i ta tatou mau ma'itiraa. Ua haapii to'u utuafare i te reira a pae matahiti i teie nei, e fatata roa vau i te ere i to'u mau taata herehia.

Te ratere ra matou te utuafare e te tahi mau hoa i te pae apato'a no Oman. Ua faaoti matou e faafaatea rii i te pae tahatai o te moana Inidia. Aita i maoro roa i muri iho, ua ani mai ta maua tamahine 16 matahiti, o Nellie, e nehenehe anei ta'na e haere e 'au i te hoê vahi one, e puu one ta'na i mana'o. No te miti to'are'are, ua parau vau ia'na, e haere na mua vau, no to'u mana'o i te opape puai.

Ua 'au rii au, ei reira ua tuô vau i ta'u vahine no te ani atu, te piri ra anei tera vahi one. Ua pahono mai oia, « Tei mua roa oe ». Aita vau i haapa'o e, ua topa vau i roto i te hoê opape faaho'i<sup>1</sup> e te hutihia ra vau i tua.

Aita vau i papû e aha te rave. Ta'u noa i mana'o, e 'au no te ho'i mai i te pae tahatai. E tera mau te ohipa eiaha e rave. Ua mana'o vau, aita e rave'a. Te huti ra te tahi puai rahi atu ta'u i ore i mana'o, ia'u i tua roa. E te mea i hape'ape'a rahi a'e ia'u, o ta'u ia vahine tei ti'aturi i ta'u faaotiraa e tei pee mai ia'u.

Te mau taea'e e te mau tuahine, ua mana'o roa vau e, eita paha vau e ora mai e no ta'u faaotiraa, na'u atoa e haapohe i ta'u vahine. Ua aro noa na maua e i to'u mana'o, ua tauturu mai te Atua, ua taahi a'era to maua avae i ni'a i te one e ua ti'a atura ia maua ia haere avae i piha'i iho i to maua mau hoa e ta maua tamahine.

E rave rahi opape i roto i teie oraraa tahuti nei—te vai ra e mea maitai no tatou e te vai ra aita. Ua haapii te perezideni Spencer W. Kimball e, te vai nei te mau puai rahi i roto i to tatou oraraa mai te mau opape ite-ore-hia i roto i te miti.<sup>2</sup> E mau puai mau te reira. Eiaha roa tatou e haavare ite ia ratou.